



মোশাররফ হোসেন খান


বিশ্ব  
দুঃখে  
মনের  
মুক্তি







বৃষ্টি ছুঁয়েছে মনের মৃত্তিকা  
মোশাররফ হোসেন খান



সমুদ্র প্রকাশনী ঢাকা

বৃষ্টি ছুঁয়েছে মনের মৃত্তিকা  
মোশাররফ হোসেন খান  
প্রকাশনায়  
সমুদ্র প্রকাশনী  
১৩/সি দক্ষিণ খিলগাঁও  
ঢাকা ১২১৯  
প্রথম প্রকাশ  
বইমেলা  
ফেব্রুয়ারি ২০০২  
প্রভুস্বত্ব  
বেবী মোশাররফ  
প্রচ্ছদ  
শাইখ শাহবাজ  
দাম  
পঞ্চাশ টাকা

তোমার উত্থানে হোক  
অন্ধকার শেষ  
প্রবল প্রশ্বাসে তুমি  
জাগাও স্বদেশ

লেখকের প্রকাশিত  
অন্যান্য গ্রন্থ

কবিতা


হৃদয় দিয়ে আগুন  
নেচে ওঠা সমুদ্র  
আরাধ্য অরণ্যে  
বিরল বাতাসের টানে  
পাথরে পারদ জ্বলে  
ক্রীতদাসের চোখ  
নতুনের কবিতা

গল্প

প্রচ্ছন্ন মানবী  
সময় ও সম্পান  
ডুবসাঁতার

অন্যান্য

বিপ্লবের ঘোড়া  
হাজী শরীফতুল্লাহ  
সাইয়েদ নিসার আলী তিতুমীর  
সাহসী মানুষের গল্প ১, ২  
রহস্যের চাদর  
অবাক সেনাপতি  
বাংলাভাষা ও সাহিত্যে মুসলিম  
অবদান (সম্পাদিত)



## কবিতাসূচি

বৃষ্টির প্রার্থনা	৯	৩৫	প্রবল প্রশ্বাসে
বৃষ্টি ছুঁয়েছে মনের মৃত্তিকা	১০	৩৬	ক্লান্তিরেখার পাদদেশে
বৃষ্টিভেজা পংক্তিমালা	১১	৩৭	ঘরহীন ঘরে
বৃষ্টির সাথে কথোপকথন	১৬	৩৮	ঘণার উপত্যকা
শ্রাবণ এখন	১৮	৩৯	হেমন্তে জাগাও তুমি
উত্তর-বর্ষায়	২০	৪০	নিগূহীতার বাহুডোরে
কোথায় থেমেছে নদী	২১	৪২	মুহাম্মদ আসাদ
ঘূর্ণি	২২	৪৩	বীজতন্ত্র
নদীর মরণ	২৩	৪৪	দশ দিগন্তের অন্তরেখা
প্রাবন	২৪	৪৬	আঁধার সঙ্গীত
শৈশবের পথে	২৫	৪৭	কাঁদো মন-ক্রন্দসী
ধলপহরে	২৬	৪৮	বরফের পিঠে
জীবনের পোড়ামাটি	২৭	৪৯	খোয়াব
বিরান প্রহর শেষে	২৮	৫১	রক্তভেজা হাতের বদল
এইতো ভিড়েছি কূলে	২৯	৫২	লজ্জার আলো
একাকী মানব	৩০	৫৩	প্রণয়ের হাঁস
হতাশার রাত শেষ	৩১	৫৪	এপিটাফ
নিয়তির দণ্ড	৩২	৫৫	শীতের দরজা
গ্রহের প্রাসাদ	৩৩	৫৬	ডামি
কালযাত্রী	৩৪		





## বৃষ্টির প্রার্থনা

ঐখানে নামুক বৃষ্টি আফগান উদ্বাস্তু শিবিরে  
তোরাবোরা পর্বতগুহায় আর ধু ধু কান্দাহার  
নামুক সুস্থির বৃষ্টি কারগিল বিরান প্রান্তর  
নামুক অঝোর ধারে, একটানা শঙ্কিত অন্তরে ।

নামো বৃষ্টি কোটি ফুয়ারায়, নেমে এসো ফিলিস্তিন  
দজলা পেরিয়ে এসো হেবরন, ফোরাতের তীর  
এসো তুমুল ভাঙবে চেচনিয়া, রক্তিম কাশ্মীর  
আল কুদসের ভেজাও জমিন, পবিত্র আস্তিন ।

বসনিয়া এসো বৃষ্টি, এসো কোহকাফ পার হয়ে  
কসোভা মাটির বুকে পশলা প্রশান্তি দাও বয়ে ।  
তার থেকে আর কিছু ঢেলে দাও আমার এদেশে  
সবুজ বাঙলা দেখ শুষ্ক হলুদ পাতার বেশে—  
কীভাবে মুষড়ে পড়েছে এক প্রচণ্ড পিপাসায়,  
মৌসুম কাঁপিয়ে এসো বৃষ্টি খরা-দঙ্ক সীমানায় ॥

বৃষ্টি ছুঁয়েছে মনের মৃত্তিকা

গভীর রাতের বৃষ্টি; বৃষ্টির ছোঁয়ায়—  
প্রকৃতি উঠেছে জেগে, জেগেছে সবুজ,  
নদীও মুখর যেন— চলেছে নায়র!  
বৃষ্টিতে হয়েছে মন— উতলা, অবুঝ ।

পেছনে রয়েছে পড়ে ক্রুদের শহর ।  
বিষাদের স্মৃতিগুলো ধূসর-অতীত,  
কী হবে যাতনা পুষে! তার চেয়ে ভালো—  
বরষায় ভেসে যাক শোকের নহর ।

রিমঝিম জাগে বন, স্বপ্নের বীথিকা,  
বৃষ্টিতো ছুঁয়েছে মন—মনের মৃত্তিকা ॥

## বৃষ্টিভেজা পংক্তিমালা

### ০১. বানভাসী

এখান থেকেই বেঁকে গেছে সুড়ঙ্গ পথটি  
ঠিক কোন দিকে, বোধের অগম্য  
দৃষ্টির সীমায় কেবল কয়েকগুচ্ছ অঙ্ককার  
আর শ্রবণইন্দ্রিয়ে ট্রেনের হুইসেলের মত  
কিছু অদ্ভুত গোঙানি।

মাছের পেটের ভিতর যে রকম পিচ্ছিল অঙ্ককার  
সে রকম আর এক অঙ্ককারে ঢেকে গেছে  
বানভাসী পৃথিবীর মুখ  
যাক, তবু মানুষের চেয়ে অবিশ্বাস্য আঁধারের  
আপাতত অন্য কোনো অর্থ নেই।

### ০২. শ্রাবণের এই ধারা

শ্রাবণের এই ধারা জীবনের চেয়েও দুর্বিষহ!  
উন্মাতাল ঝিলটি এখন লাফিয়ে উঠছে দোতলায়।  
পানি আর পানি! তবু পানি নেই পিপাসার।  
জীবন- জীবন! তবুও জীবন নেই তোমার-আমার।

### ০৩. বৃষ্টিস্নাত

রাত দশটায় বেইলী রোডও আজ বৃষ্টিস্নাত।  
টান্গাইল শাড়ির আড়ালে তুমিও কি ভিজেছো আমার মত?  
ছাতাটা হারিয়ে ফেলেছি অন্য কোথাও  
তোমার ঐ ফিনফিনে আঁচলে কি রক্ষা পাবে শীর্ণ দেহ!  
বন্যার তাগবে ভেসে গেছে সকল সড়ক  
তবুও হাঁটতে থাকি—  
যদি পার চলে এসো তের বাই সি'র বাসাটিতে  
বর্ষণমুখর শ্রাবণে চলবে রাতভর সেখানে শব্দের মহোৎসব।

### ০৪. তুমিও জানতে

তুমিও জানতে এমনটি হবে।  
শ্রাবণ ভাসিয়ে নিয়ে যাবে আমাদের, বহুদূরে।  
আর উপহাস করবে বনানী, ধানমণ্ডি, পাঁচতারা শেরাটন।  
তুমি কি উদ্ভিগ্ন?  
এই দেখ, আমার সকল লজ্জা পলিথিনে মুড়ে  
ছুঁড়ে দিয়েছি বানের জলে, তাদের দিকে।  
আমার মুঠোয় এখন উদেগহীন ঘৃণার পাথর।  
তোমার?

### ০৫. সারারাত

সারারাত একটানা বৃষ্টি।

তোমার চোখের মত ভারাক্রান্ত মেঘ।

শীঘ্র কান্না থামারও কোনো আলামত নেই।

চিন্তাক্রিষ্ট কপালের মত কুচি কুচি ডেউয়ের দোলা।

বানভাসী লাশগুলো হয়ে গেছে একেকটি তারা।

শ্রাবণের শোভা নিয়ে এখন কে আর ভাবে!

### ০৬. মৃত্যুর সোপান

শ্রাবণ শ্রাবণ! শ্রাবণের এই বান।

বানভাসী এলোকেশী—বাঁচে না তো প্রাণ!

আমার শ্বাস হলে বায়ুর তুফান,

তুমিও কি হতে বলো মৃত্যুর সোপান?

### ০৭. মানচিত্রের দিকে

তুমি শুয়ে আছো, আধশোয়া

চোখদুটো বুজে আছো ঝিনুকের মত

মাথাটা পড়েছে ঝুঁকে বালিশের নিচে

এভাবেই কি বৃষ্টিতে ধুয়ে নিষ্ণ তোমার সকল গ্লানি?

আমি অনিমেষ চেয়ে আছি

তোমার বিধ্বস্ত মানচিত্রের দিকে।

### ০৮. গৃহবন্দি

যে যার মত সবাই লিখে গেছে দাসখত

যারা দাসানুদাস—তারাই আছে বেশ সুখে

পোড়ামুখি এই দেশে।

শান্ত সময়ের তারা শ্রেষ্ঠ দাসের সন্তান।

আজকাল অনেকেই বলে:

‘ভীষণ নির্বোধ তুমি

অনর্থক পড়ে আছো নিজের ভিতর

ধরতে পারোনি সময়ের মাছ

কিংবা পরতে পারোনি কালের পোশাক

তাইতো কাটাচ্ছে তুমি

দুঃসহ—একাকী গৃহপালিত জীবন’।

সাত্বিতই তো

অন্য এক বানে ভাসিয়ে সব করেছে একাকার,

আমি আছি নিজের ভিতর গৃহবন্দি, নির্বিকার।

## ০৯. বৃষ্টির মহিমা

সারা রাত একটানা বৃষ্টি  
একাকী গুমরে কাঁদে বিষণ্ণ বিছানা  
জানালার পর্দা উড়ে ওপাশের ঘরে  
স্পষ্ট করে তুলেছে তোমার  
হলুদ শরীর।

তুমিও বৃষ্টির মত ছুঁয়ে যাও  
আমাকে  
যদি তুমি পড়ে থাকো বডুচণ্ডিদাস  
আর যদি বুঝে থাকো  
রিমঝিম এই বৃষ্টির মহিমা

## ১০. বৃষ্টির বিস্ময়

তারপর একদিন বৃষ্টিহীনে  
শস্যগুলো ঝরে গেল  
বৃষ্কের শিশ্নাগ থেকে  
ছিটকে পড়লো বীজের উত্তপ্ত বীর্ষ

এভাবে আদিতে  
বৃষ্টিহীন পৃথিবীতে  
চাষ হলো নতুন ফসল  
একদিন  
মেঘের প্রাচীর ভেঙ্গে বৃষ্টি এলো  
মৌসুমের  
প্রথম বৃষ্টিতে শুদ্ধ হলো  
যুথবন্ধ আদিম শরীর

সেই থেকে একে একে বেড়ে যায়  
বসন্তের  
অনন্তের  
মানব মুকুল  
অতঃপর বৃষ্টির শরীর পায় বৃষ্কের বয়স

হাওয়ার উপকূল থেকে বৃষ্টির শিশ্নরা  
মেঘালয় ছুঁয়ে ছুঁয়ে হেঁটে যায়  
হেঁটে যায় জলীয় জোছনা  
পৃথিবীর আদি থেকে  
শুদ্ধতম অনন্তের দিকে।

## ১১. বৃষ্টি ও বিপ্লবী

এইভাবে ভিজ়ে ভিজ়ে এলাম  
বাইরে কি তুমুল বৃষ্টি  
কোথাও আলো নেই  
তেজ নেই সূর্য মানবের

দূরে ডাকে দুষ্ট শৃগালিনী  
বহুকাল—গুহাবাসী যেন কাহাফের সাথে  
দেখিনি পৃথিবী আর সোনালী সবুজ  
রূপালী মাছের ডিম্ব হারিয়ে গেছে কবে  
হৃদয় থেকে অদৃশ্য সমুদ্রে

তোমার হৃদয়ে জ্ঞানি বসবাস করে নাক্ষত্রিক অভিলাষ  
ওটা জ্বলে দাও  
দেখ, তুমুল বৃষ্টিতে ভিজ়ে দাঁড়িয়ে আছি অবরুদ্ধ দরোজায়  
ডেকে নাও  
অন্তত একটি রাত কাটাতে দাও কোমল নিবাসে  
পৃথিবীকে দেখ  
চোখের কার্নিশ বেয়ে ঝরে কেমন রক্তগোলাপ  
বর্ষার পূর্বেই বহমান রক্তে লেখা হয়েছে— বিপ্লব  
আর একজন বিপ্লবী কিভাবে বর্ষার বিরোধী হবে

বহুকাল অনিদ্রায় আছি  
আজ, এই একটি রাতের জন্মে অন্তত বিছিয়ে দাও  
তোমার বাদামী আঁচল  
পান করাও স্নিগ্ধতার কোমল পর্বত  
কাল প্রভাতেই ছড়িয়ে দেব শহরময়—  
ফলসা গ্রাম, কল্কুরী হাওয়া  
সঘন বর্ষায়

## ১২. সেতু

সে আর আমি চলেছি পাশাপাশি  
এবং হেঁটে হেঁটে পাড়ি দিচ্ছি সুষমা যমুনা  
পড়ন্ত বিকেল

নীল যমুনার চোখের ভেতর মুখ লুকিয়ে  
বিশ্রামে যাচ্ছে বর্ষীয়ান সূর্য

আমাদের মাথার ওপর দিয়ে উড়ে যাচ্ছে  
প্রজ্ঞাপতি মেঘ, ঝির ঝির বাতাস  
আবার কখনো বা ইলশেগুঁড়ির মত বৃষ্টির দুহিতা  
তুমি তাকিয়ে আছ আকাশের দিকে  
আর আমি ক্রমশ হারিয়ে যাচ্ছি

এক অপার্থিব রহস্য গভীরে  
আহ! কবে যে গর্ভবতী ইলিশের মত  
তোমার চিতানো বুকে হামাগুড়ি দিয়ে  
পার হয়ে যাব সুনয়না পদ্মা!

হে সুজলা,

তুমি কি হতে পারোনা আমার জন্য  
বৃষ্টিভেজা সেতুর উপমা ?



## বৃষ্টির সাথে কথোপকথন

এক.

সবাই ঘুমিয়ে গেছে, যাক ।

এই বরং ভাল হলো—

এস, তুমি আর আমি গল্প করি রাতভর  
বৃষ্টির দুহিতা!

দুই.

মাঝে মাঝে এরকম হয় ।

হঠাৎ কান্নার শব্দে জেগে উঠি ।

তারপর বারান্দায় দাঁড়িয়ে মিশে যাই

আকাশের সাথে

আর তুমি কাশ্মীরী রমনীর মত নেমে আসো  
মেঘালয় থেকে ।

দেখ, আমাদের হাওয়ার কার্পেটটি আজ

কেমন ফুলে উঠেছে!

আর আমাদের মাঝখানে দুয়োরানীর মত

পা এলিয়ে বসে আছে শ্রাবণীর মেয়ে ।

শ্রাবণী তো আর কেউ নয়,

সে কেবল তোমারই রোদনের ধারা!

তিন.

চেয়ারে বসে আছ তুমি ।

চুলগুলো ছড়িয়ে পড়েছে পায়্যা অবধি ।

তুমি তাকিয়ে আছ আমার দিকে

আর আমি শূন্যের দিকে ।

অবিরাম বর্ষণই যেন আমাদের সালিসি বৈঠক!

চার.

তোমার আঁচলটি দুলছে হাওয়ায় ।  
কোথায় চলেছো মেঘ-মুয়ুরী?  
আর কিছুটা ভিজিয়ে যাও আমাদের পোড়া বাংলা  
দেখ, দারুণ তৃষ্ণায় কাতর—  
ব্যথিত কৃষক ।

পাঁচ.

যারা পেরেছে তারা তোমার সমগোত্রীয়  
যখন পারার ছিল, তখন পারিনি  
এখন কি আর পারবো?  
তবুও কেন যে ডাকো এভাবে, বারবার!

ছয়.

যতপার ঝরে যাও ।  
ভাসিয়ে নাও তোমার কাছে  
আমি তো হতে চাই শুচিশুদ্ধ  
কিন্তু জানি না—  
কতটুকু পরিশুদ্ধ হবে অশান্ত পৃথিবীর  
কালশিটে প্রান্তর!

সাত.

এই দেখ, যখন তোমার সাথে করছি  
দীর্ঘ আলাপন  
ঠিক তখনই কারগিল ভাসছে রক্তবন্যায় ।  
দোহাই বৃষ্টিকুমারী!  
পিপাসা মেটানো থেকে তাদেরকে  
বঞ্চিত করো না ।

## শ্রাবণ এখন

১.

বৃষ্টিতে ভিজে প্রতিদিন ঘরে ফিরি চকিবশ পৃষ্ঠার বিষাদ আর দুর্ভাবনা নিয়ে ।  
সংবাদপত্রের প্রতিটি বর্ণই যেন একেকটি বিষধর অজগর ।  
ভয়ে আজকাল জানালা দরজা দিয়েও ঢুকতে দেই না সূর্যকে ।  
না জানি আবার কোন্ অছিলায় প্রবেশ করে ভয়ানক হস্তারক!  
হে শ্রাবণ! হে প্রবল বৃষ্টি!  
তুমিই কেবল পার ধুয়ে সাফ করে দিতে নোংরা প্রকৃতি!  
দোহাই বৃষ্টি!  
বাংলাদেশকে গোসল করিয়ে এক টুকরো আবরণে অন্তত ঢেকে দাও  
তার ছতর । বড়ো দগদগ করছে বিষাক্ত ক্ষতগুলো!  
দেশটির দিকে আর তাকাতে পারছি না!

২.

বাইরে তুমুল বৃষ্টি ।  
কোথায় বৃষ্টি?  
জানালা খুলে দেখি রক্তবমন করছে আজাজিল  
আর আকাশের কোণা ধরে প্রস্তুত ভঙ্গিতে বসে আছেন ইসরাফিল ।  
আমাদের মেঘগুলো কোথায় গেল?  
নাকি তারা আশ্রয় নিয়েছে আজ মানুষের হৃদয়ে!  
তাহলে এতক্ষণ যাকে বৃষ্টি বলে ভেবেছি, সে কেবল  
মানুষেরই রোদন?  
মেঝের দিকে তাকিয়ে দেখি—  
ঝাঁঝির খণ্ডিত ডানার মত একপাশে কাত হয়ে পড়ে আছে  
এশিয়ার মানচিত্র । আর তার পাশেই গড়াগড়ি খাচ্ছে ওস্তাদ  
আলাউদ্দিন খাঁর ভাঙ্গা এসরাজ!  
আফসোস! আজ আর কোনো বৃষ্টির সঙ্গীতই বাজবে না—  
'এমন দিনে তারে বলা যায়'—  
না! কিছুই বলা যায় না।—  
শুধু জিজ্ঞেস করা যায় ; আর কত কাঁদবে হে বিপুলা পৃথিবী!

৩.

আশা ছিল, এবার বৃষ্টিতে ফুটে উঠবে ঘুমন্ত বীজগুলো  
মৃত্তিকা ভেদ করে মাথা উঁচু করে বুঝাবে কচি প্রাণ :  
'আমরা এসেছি, এইতো এসেছি আলোর উদ্ভাসে ।  
আমাদের দেখাও তবে নদীর মোহনা ।'

কীভাবে বুঝাবো তোমাদের, আমাদের আজ আর কোনো নদীই নেই!  
বরং তোমরা ফিরে যাও পুনরায় বীজের আধারে  
যেমন ফিরে গেছে আমাদের স্বপ্ন-সম্ভাবনার সকল স্তর।  
দেখো, এই বর্ষা ঋতুতে ফলবতী শস্যক্ষেতও কেমন ফেটে  
দু'ভাগ হয়ে গেছে!  
তার হা-এর ভেতর থেকে এখন কেবল অগ্নিময় দীর্ঘশ্বাসের উদ্‌গীরণ!  
আমরা তো হয়ে গেছি আফ্রিকার কৃষ্ণমৃগ।  
বৃষ্টির সপক্ষে আজ আর একটি পয়ারণ রচিত হবে না!

৪.

‘নীল নবঘনে আষাঢ় গগনে’—

কোথায়?

এখানে আষাঢ় আসেনা, আসেনা আর কোনো বর্ষা ঋতুই।

এ কেমন বক্ষ্যা প্রহর!

এ কেমন নাগিনী নিঃশ্বাস!

বৃষ্টিও উধাও হয়ে গেছে এশিয়া থেকে!

আর মেঘগুলো হিমালয়ের পাদদেশে উপুড় হয়ে কেবল  
আর্তনাদ করছে।

তবে কি বঙ্গোপসাগরও হয়ে যবে বিমান বন্দর!

পাশ ফিরে দেখি, লজ্জায় মুখ ঢেকে ফুঁপিয়ে কাঁদছেন নজরুল,

আর রবীন্দ্রনাথ হাওয়া পরিবর্তনের জন্য বজরা হাঁকিয়ে

ছুটে চলেছেন দক্ষিণের ভাটিতে!

হায়রে শ্রাবণ!

শ্রাবণ এখন আশ্রয় নিয়েছে ‘রেখানীড়ের’ চার তলায় রাজহাঁসের পালকের নিচে’

বৃষ্টি বৃষ্টি বলে আর কেউ কোনোদিন প্রার্থনা করো না।

বৃষ্টি মানেই তো এশিয়ার রক্তবন্যা!

## উত্তর-বর্ষায়

উত্তর-বর্ষায় জেগেছে নতুন ভোর । শরতের  
ম্লিঙ্ক শিশিরে আবৃত । কৃষকের ভারী পদছাপ  
পড়ে আছে নরোম ঘাসের বুকে । অবিকল যেন  
ভেজা মাটির শরীরে পাঁচটি আঙুল একে গেছে  
কোনো এক মহৎ শিল্পের সুখমামণ্ডিত ছবি ।

এ আমার সবুজ ফসল আর সিক্ত মৃত্তিকার  
নিজস্ব অর্জন । ঘুঘরো বা কেঁচো-আঁকা চিত্রকর্ম,  
প্রচ্ছদও— কী বিস্ময়কর! পৃথিবীর আর কোন্  
শিল্প আছে এর সাথে তুলনীয়? ভ্যানগগ নন,  
নন লিউনার্দো কিম্বা এনজেলো, এ আমার দেশ—  
বৈচিত্র্যে ভাস্বর— জগৎ-বিখ্যাত এক স্থিরচিত্র ॥

## কোথায় থেমেছে নদী

পেছনে আঁধার নামে । বৃষ্টি ঝরে । সম্মুখে তুফান ।  
হাতের তালুতে স্থির তবু এক শাদা কবুতর ।

পালকের গন্ধে তার ভেসে যায় মুক্তির আখ্যান  
কোথাও নেমেছে ঢল, ভেঙেছে স্বপ্নলোকের ঘর ।

হীরক বস থেকে ঝরে গেছে মোহন দুপুর  
কোথায় থেমেছে নদী—এলোকেশী জলের নূপুর?

## ঘূর্ণি

ধূসর কুয়াশা ঘিরে অবাক পুরুষ  
হাঁটু গেড়ে বসে গেছে কাকের শহরে ।

উল্টো দিকে ঘুরে গেছে সময়ের মুখ ।  
ভেসে গেছে স্বপ্নসুখ গর্ভের লালায় ।

জীবন যেন বা অচেনা খেয়ার তরী  
আধেক আলোয় তার আধেক আঁধার ।

পথের সমাপ্তি ভেবে বসেছি যেখানে  
অবশেষে জেনে গেছি সমাপ্তি সে নয় ।

মহাকাল আছে বেশ দারুণ ফূর্তিতে  
আমি শুধু পাক খাই প্রবল ঘূর্ণিতে॥

## নদীর মরণ

স্বপ্নের দৌড়ের মত থেমে আছে বিশ্বয়ের কাল!  
প্রতীক্ষায় কেটে গেছে কপোতাক্ষে অটল প্রহর  
ভাতের থালায় উড়ে বসে কাক, চিলের বহর  
প্রবল প্রশ্বাসে ছিড়ে গেছে উজানী নৌকার পাল।

বেদনায় ভিজে যায় কৃষকের বুকের পশম।  
বৃষ্ণের রোদন দেখে কেঁদে ওঠে জননীর প্রাণ।  
নেতিয়ে পড়েছে আহা দুষ্কহীনে গাভীর গুলান  
দুখিনী নদীর জন্যে এতোটুকু নেই উপশম!

পানির কলসে একি! বিষধর কেউটের ফনা!  
খরতাপে পাথরও হয়ে গেছে রোগাক্রান্ত ফিকে  
ভয়ংকর মৃত্যুর ছোবল হেনে যায় চারদিকে।  
সীমার দেবে না পানি? তবে নাও বারুদের কণা!

চারদিকে মরুভূমি কেবলই ভস্মের ক্ষরণ  
থমকে দাঁড়িয়ে দেখো আমাদের নদীর মরণ!



## প্লাবন

অবিকল মানুষের মত একটি ছায়ার কংকাল  
প্লাবিত মানচিত্র ব্যাপী একটি ছায়া আমার মুখোমুখি ।  
ত্রাণশিবিরের চারপাশ কেবল রোদনের হাহাকার  
জলমগ্ন মানচিত্র যেন পরিত্যক্ত ট্রেনের বগি ।  
আমার মুখোমুখি উদ্বাস্তু মানুষ আর ছায়ার কংকাল  
প্লাবিত অসহায় শহরের মত ক্লিষ্ট, বেদনাহত ।  
বিষাক্ত পানিতে ভাসিয়ে দেয়া লাশগুলি

কোনোদিন পাবেনা আর মাটির নাগাল!

আমার স্বরণদ্বীপে ভয়াবহ প্লাবন, মৃত্যুমুখি ছায়ার কংকাল!  
পানিবন্দি আতঙ্কিত মানুষ থেকে ত্রাণশিবির যোজন দূরে ।  
ত্রাণশিবিরেও ছুই-ছুই পানি ।  
পানিবন্দি মানুষের চোখে ধেই ধেই নেচে ওঠা মৃত্যুর নূপুর ।  
কায়াহীন ছায়া, ছায়ার কংকাল ।  
ঠিক মানুষের মত কথা বলে, কেঁদে ওঠে প্রচণ্ড ত্রাসে!  
আমার অস্তিত্বের দুর্ভার কবুতরের হাঙ্কা পালকের মত  
ঝরে গিয়ে ক্রমশ কোষা হয়ে গেলেও  
ফুলে ওঠা বিষাক্ত পানি গ্রহণ করেনি বেওয়ারিশ লাশ!  
উদ্বাস্তু মানুষগুলো আজ

জলমগ্ন মানচিত্রের বিবস্ত্র সেনাপতি ।

আমার অস্তিত্বের আচ্ছাদন নিয়ে হেঁটে যাচ্ছে নির্লজ্জ প্লাবন ।  
আমার বিবস্ত্র দেহের দুর্ভার লজ্জা ভেসে যাচ্ছে,

আছড়ে পড়ছে বিষাক্ত পানিতে ।

আমার অস্তিত্বের সমাধি নিয়ে চলে যাচ্ছে দুর্দমনীয় বেগবান স্রোত ।  
ত্রাণশিবিরেও ছুই-ছুই পানি ।

বিষাক্ত পানির মুখে লাশের মিছিল ।

লাশগুলি কোনোদিন পাবেনা আর মাটির নাগাল!

অস্তিত্বহীন আমি এখন বিষণ্ণ, জলমগ্ন বাংলাদেশ!

আমার কেশরাশি প্রতিটি লাশের জন্য

একেকটি শোকাবহ মিনার!

বানভাসী জলমগ্ন উদ্বাস্তুর চোখে অনিশ্চিত সকাল ।

সহস্র সূর্য চূড়ান্তভাবে জ্বলে উঠলেও যেন

উষ্ণ হবার নয় জলমগ্ন ভয়ার্ত হৃদয় ।

উদ্বাস্তু মানুষের চোখে কেবল মৃত্যুর উৎসব!

আফসোস!

আজ আর কোনো হতাশনেই

এশিয়ার জলবায়ুতে একবারও কম্পন ওঠে না!

## শৈশবের পথে

যুমিয়ে পড়েছো কপোতাক্ষ  
নাকি জেগে আছো আমার মায়ের সাথে!

স্মৃতির গভীরে টোকা দিয়ে যায় জাগ্রত প্রহরী ;  
মনে পড়ে? হেঁটে যাচ্ছে খালি পায়ে বাঁকড়ার হাটে ।  
ধূলায় ধূসর চারদিক । পড়ন্ত বিকেল—  
উদোম শরীরে শাঁ শাঁ গতিতে চলেছে  
গাঁয়ের কৃষক । বোগলে গুটানো মলিন থলে!—  
তবুও প্রতিটি পদক্ষেপ সুদৃঢ়, কঠিন—  
যেন দুর্বিনীত এক বাতাসের ঘোড়া, কিংবা  
লকলকে বেড়ে ওঠা সোনালি ধানের শিস!

ধূলি-কাদা রাস্তা মাড়িয়ে সেই তো কবে—  
বহুকাল আগে গিয়েছি সেখানে;  
যেখানে একাকী বসে থাকেন মমতাময়ী আমার জননী!—  
সেই প্রশান্ত পুকুর— মায়ের উষ্ণ প্রস্থাসে  
ফ্যাকাশে হয়েছে যার সবুজ চাতাল,  
পুকুরের পানিও হয়েছে লাল— মায়ের অশ্রুতে!  
কতকাল চলে গেল, সে পথে হয়নি হাঁটা!  
এখনতো ভরেছে উদর দূষিত বাতাসে,  
আর অজগর বেষ্টিত এই পাথর শহরে  
কীভাবে যে বন্দি হলাম নিষ্ঠুর নিগড়ে!

তবুও ফিরতে চাই—  
হাঁটতে চাই শৈশব মাড়ানো ঐসব পথে,  
ভরে নিতে চাই বুক—  
কপোতাক্ষ আর মায়ের নিবিড় পরশে ।

তুমি কি নেবে না মাগো! তোমারই বৃকে টেনে—  
চুয়াল্লিশ ছুঁয়ে যাওয়া এই অবোধ শিশুকে!

## ধলপহরে

ধলপহরে বিরান মাঠে একলা আমি  
মাথার পরে আগুন বরা দহন তাপ ।

সামনে ধূধু কেবল শুধু তেপান্তর ।  
একটু বাঁয়ে বনের ধারে ত্রুঙ্ক ডাক  
পায়ের নিচে শিয়ালকাঁটা ফোটায় হল  
বিষের বানে বাঁধ ভেঙেছে জীবনকূল ।

দীঘির জলে যেমন দোলে পদ্মপাতা  
যেমন ফোটে ঘাসের নাকে শিশির কণা  
তেমন করে কষ্টগুলো দিচ্ছে দোলা  
চিটাভস্মে উঠছে ভরে আমার গোলা ।

ধলপহরে শিয়াল ডাকে হুঙ্কা হয়  
হাঁড়ির পেটে মোচড় মারে মন্ত কুয়া ॥

## জীবনের পোড়ামাটি

নদীতে সাঁতার কেটে কেটেছে কৈশোর  
যৌবন নিয়েছে বাঁক সমুদ্রের দিকে  
ক্রমশ হয়েছে চাঁদ—আলোহীন ফিকে,  
উত্তর যৌবন আজ মরুর উষর!

স্বপ্নের ছালুনগুলো হয়ে গেছে বাসি  
বাড়ের দাপটে কম্পিত ঘরের চাল  
প্রবল তাগবে ওড়ে নিয়তির পাল,  
মাস্তুলে হাসে কে নর-পিশাচের হাসি!

শস্যহীন মাঠ যেন শবের কাফন!  
দীর্ঘশ্বাসে পুড়ে গেছে সবুজের নাতী,  
জলহীন নদী আর দুষ্কহীন গাভী—  
শুক্ক বালির বসনে হয়েছে দাফন!

ভিতর বাহিরে দাহ, আগুনের পাটি  
পুড়ে পুড়ে থাক—জীবনের পোড়ামাটি ॥

## বিরান প্রহর শেষে

এটা হলো বৈশাখের কাল । তুমি কি পড়তে পার  
ডুবন্ত সূর্যের ভাষা আর নীড়হারা পাখিদের  
রোদনের দীর্ঘশ্বাস? এখন সাগরমুখী নদী ।

ভাটির উচ্ছিষ্ট গুগলি শামুক পড়ে আছে স্থির  
চিকচিক বিস্কৃৎ বালিতে । মাথার ওপরে, শূন্যে  
আর কোনো গাঙচিল দেখিনা । শুনিয়া আর কোনো  
ডাহকের ডাক । প্রকৃতি এখন আর উপমেয়  
নয় । এমনকি নয় তোমার চোখের মত । এই  
গাঙ্গয়ে বদ্বীপে একদা যা ছিল কাব্যের প্রতীক ।

এটা হলো ক্ষরণের কাল । কেউবা বলেন, চৈত্র ।  
তবে কি বৈশাখ খুলে দেবে তার রহস্যের দ্বার?  
যেখানে রয়েছে জমা স্বপ্ন আর বিপুল বিশ্বয়!

ধরিত্রী, প্রশান্ত হও । থেমে যাবে সকল প্রলয়,  
বিরান প্রহর শেষে পেয়ে যাবে আপন নিলয় ।

## এইতো ভিড়েছি কূলে

কঠিন শিলার স্তর, তীব্র বজ্রাঘাত  
ভূফান তরঙ্গ আর মরুঝাড় সয়ে  
এখনো চলেছি কালের সুড়ঙ্গ বেয়ে ।

আমি তো জানিনা পথ— পথের দূরত্ব  
জানিনা বরফ ঢাকা নদীর ঘনত্ব!  
এতটুকু জানি শুধু গন্তব্যের বাড়ি—  
যতই হোকনা দূরে, দিতে হবে পাড়ি ।

কেটে গেছে জীবনের দুইভাগ কাল,  
এক ভাগে জাগে তবু স্বপ্নের প্রবাল ।  
যতটুকু আছে পথ, আছে অভিঘাত  
ততোটুকু পেরুলেই— নবীন প্রভাত!

ঘুরেছি গিরি-গুহা, কঠিন প্রান্তর  
পেরিয়ে এসেছি শৃঙ্গ, প্রমত্ত সাগর,  
এইতো ভিড়েছি কূলে, ফেলেছি নোঙ্গর ॥

## একাকী মানব

এই মহাকাশ, এই অতলান্ত মহাকাল আর  
এইসব মহাদেশ, পাহাড় সমুদ্র উপকূল  
কোথাও প্রশান্তি নেই, নেই এতটুকু উজ্জ্বলতা,  
বাঁশের কাণ্ডের মত নুয়ে আছে কেবলি শূন্যতা ।

কতো কাল হলো— মানুষের বিপরীতে চলে গেছে  
মানবতা, বোধ আর যত আছে সুকুমার শব্দ ।  
অশুদ্ধ আঙনে পুড়ে গেছে শিল্পের দীপ্ত সুষমা,  
উড়ে গেছে বাষ্পের শরীর বেয়ে সৌখিন উপমা ।

মহাদেশ, মহাকাল ছেয়ে আছে চতুর শকুন  
সময়ের গ্রীবাদেশ ছুঁয়ে আছে সুতীক্ষ্ণ নখর ।  
'বাঁচাও বাঁচাও!'— কে আর আসবে বলা মৃত্যুদ্বীপে?  
যারা পারে— তারাও ভিড়েছে আজ শকুনের দলে ।

শকুন শকুন! চারদিকে নৃত্যরত শকুন-দানব,  
অগ্নিকূলে বসে আছি এই আমি— একাকী মানব ।

## হতাশার রাত শেষ

হতাশার রাত শেষ । ঝলমলে সূর্য  
হাসে নিকানো উঠোনে । কৃষক ছুটেছে  
মাঠে । সবুজ ফসলে ভরে যাবে আজ  
পুবের খলেন । দিনশেষে রাত এসে  
পুনরায় জেলে দেবে জোছনার আলো,  
দূরে যাবে যত আছে বিষাদের কালো ।

আঁধার আঁধার বলে করোনা বিলাপ  
মেঘের আড়ালে আছে চাঁদের গিলাফ !

স্বপ্নগুলো তুলে নাও আমনের মত  
ভরে তোলা বুক আর হৃদয়ের গোলা;  
আসুক খরার কাল, ঝড়-ঝঞ্ঝা শত  
তবুও হৃদয়ে ভরো সাহসের দোলা ।

তবে আর শঙ্কা কেন! শুধু বরাভয়—  
সাহসী মানে না কোনো বাধা-পরাজয় ॥



## নিয়তির দণ্ড

এই রাত— নিস্তরু গভীর রাত জেগে আছে  
পরিভ্যক্ত প্লাটফর্মের মতন ।  
আমি তার একমাত্র সহযাত্রী ।

বয়সী কাকের মত ঝিমুচ্ছে পৃথিবী ।  
চোখ তার তুলুতুলু—ক্ষুধার উপমা ।  
মালবাহী ট্রেনের মতন চলে যাচ্ছে পাংশুটে শহর ।

হঠাৎ কান্নার শব্দ!  
চোখ মেলে দেখি—  
পায়ের নিচে ফুঁপিয়ে কাঁদছে পৃথিবী ।  
পাশে তার ভাঙ্গা বেহালার ছড়  
আর সুতো ছেঁড়া ঘুড়ির মতন উড়ে যাচ্ছে শূন্যে  
ছতরের রক্তাক্ত কাপড় ।

হাঁটুর ভিতর মুখ লুকিয়ে কাঁদছে সে ।

কাঁদো পৃথিবী—কাঁদো অনন্ত কাল....  
কেমনা তুমিই তো স্বপ্নের খোড়ল থেকে  
আমাকে অপসারণ করে ঢুকিয়ে দিয়েছো  
বিষধর অজগর ।

তুমি কেঁদে যাও—  
তোমার চোখের পানিতে ভিজ়ে যাক মাটির হৃদয় ।  
আর আমি হব কৃষকের তরবারির মতন চক্চকে  
স্বপ্নভার লাঙলের ফলা ।

আমি ছাড়া তোমার কান্না শোনার মত  
আর কে আছে পৃথিবী, বলো!  
তোমাকে বহন করাই যে আমার পাল ছেঁড়া নিয়তির দণ্ড ।

## গ্রহের প্রাসাদ

তুমি বসে আছ গ্রহলোকের একটি সুনসান বারান্দায় ।  
বসন্তের ঝাউয়ের মত চারপাশে ছড়িয়ে পড়েছে  
তোমার সুগন্ধি ঘনকাল দীর্ঘ চুল ।

তুমি বসে আছ অসংখ্য নক্ষত্রের মাঝে ।  
হাতে এক অনাস্বাদিত কফির উজ্জ্বল পেয়ালা ।  
গভীর আঁধারে চোখ রেখেছ ইন্টারনেটে ।  
কফিতে চুমুক দিতে দিতে আনমনে দেখে যাচ্ছ  
গ্রহবাসীর বিচিত্র সব খবরা-খবর ।

খুব যত্নে সাজিয়েছ তুমি গ্রহের প্রাসাদ ।  
পশ্চিমে ঝুলন্ত বর্ণিল পর্বত ।  
পেছনে বাঁধানো লেক, সুইমিংপুল ।  
স্বচ্ছ পানিতে নীরবে হেসে হেসে দোল খাচ্ছে  
শাপলা-শালুক আর অজস্র ফুটন্ত তারার প্রতিচ্ছায়া ।

বরফের সিঁড়ি ভেঙ্গে আয়েশী ভঙ্গিতে তুমি নেমে যাচ্ছ  
পড়ন্ত বিকালে সামনের পরিচ্ছন্ন ফুলের বাগানে ।  
একাকী হাঁটছো আর গুণগুণ করে গেয়ে যাচ্ছ নজরুল সংগীত ।  
একটু গভীর হলে রাত—  
খুব কাছ থেকে ভ্রাণ নিচ্ছ পূর্ণিমা চাঁদের ।

বেশ কেটে যাচ্ছে তোমার সময় ।  
ইচ্ছে হলেই ছুটছো স্বয়ংক্রীয় যানে অন্য গ্রহে ।  
কিংবা যাচ্ছ পশ্চিম গোলার্ধে বিপণী বিতানে ।  
কখনো বা হাওয়া বদল করতে ছুটছো পৃথিবীর দিকে ।

গ্রহপথে হেঁটে হেঁটে কখনো বা ক্লাস্ত হলে  
কিংবা কোনো এক উদাস বিকালে  
হয়তো বা মনে পড়বে পুরনো এক পৃথিবীর কথা ।  
হাজার বছর আগে যাকে ফেলে এসেছ অনেক অবহেলায় ।  
যেখানে মুখর ছিল মানুষ আর পাখির কলরবে ।  
ঠিক সেই বিষণ্ণ সময়ে—  
হয়তো বা হঠাৎ করে তোমার খুব ইচ্ছে করবে কবিতা পড়তে । তখন—  
ঠিক তখনই তুমি অনুভব করবে তোমার বাম পাঁজরে আমার  
সরব উপস্থিতি ।

হাজার বছর পরে  
আমাদের দেখা হবে হয়তো বা এইভাবে ।  
তোমার সাজানো গ্রহের প্রাসাদে হবো মুখোমুখি ।  
আর খুব কাছ থেকে পরস্পর করবো স্মরণ,  
হে অনন্তিকা! তোমার জন্য রেখে যাচ্ছি আজ  
মাটির পৃথিবী থেকে কয়টি চরণ ।

## কালযাত্রী

শস্যের ক্ষেত মাড়িয়ে সবাই নেমেছে প্রতিযোগিতায় ।  
ক্লান্ত গলায় ঢালছে তারা জমাটবাধা রক্তের গ্লাস  
আর মানুষের চামড়ার তৈরি ন্যাপকিনে  
মুছে নিচ্ছে বিলাসের ঘাম ।

দৌড়াও খরগোশ ।  
ছোটো, যতক্ষণ দেহে আছে প্রাণ ।

সবাই নেমেছে প্রতিযোগিতায় উন্মাদ মোষের মত  
কে ছুঁয়ে যাবে স্বার্থের নিশান, কতটা আগে ।

নামুক । আমার কোনো দৌড়ের ইচ্ছাই নেই ।  
এইতো আমি দাঁড়িয়ে আছি এইখানে—

উত্তপ্ত গ্রহের পাদদেশে ।

বহু আগেই উপকে এসেছি কান্নার নদী  
এখন তো কেবল কালের পিঠে ঠেস দিয়ে দেখে যাওয়া—  
চতুর খরগোশের হাস্যকর উর্ধদৌড় ।

সবাই নেমেছে প্রতিযোগিতায় ।  
নামুক । আমি এখন সময়ের পলিধিনে  
কিছু স্বপ্ন ভরে মুখ ফিরিয়েছি বিক্ষুব্ধপৃথিবী থেকে  
আর এক মহাপৃথিবীর দিকে ।

## প্রবল প্রশ্বাসে

তুমি জাগো। জেগে ওঠো সমুদ্রের ডাকে  
জেগে ওঠো সময়ের শান্ত চোখ মেলে,  
মৃত্যুর শিখর থেকে জেগে ওঠো তুমি—  
জেগে ওঠো স্বর্ণশীষ—পর্বতের তুমি ।

শিরায় শিরায় বয়ে যাক দীপ্ত তেজ  
বয়ে যাক স্বপ্নধারা— বিপুল ঝরণা,  
জেগে ওঠো গুহা থেকে আমূল নবীন—  
ভেঙ্গে আনো শঙ্কাহীন সবুজের দিন ।

তুমুল তাণ্ডবে ওড়ে সাহসের ঘুড়ি  
উড়ে যায় ফুঁড়ে যায় সুনীল আকাশ,  
জেগে ওঠো । —শোনো চাতকের ডাক  
তোমার দৃষ্টিতে বেদনারা দূরে যাক ।

তোমার উত্থানে হোক অন্ধকার শেষ,  
প্রবল প্রশ্বাসে তুমি জাগাও স্বদেশ ॥

## ক্লান্তিরেখার পাদদেশে

সহস্র বাঁক পেরিয়ে আমি এখন এখানে—  
ক্লান্তিরেখার অসম পাদদেশে ।

মাথার তালুতে বাজের ছেবল আর  
অবাক্তিত এক ঘূর্ণিতে কেবলি  
কেঁপে উঠছে আমার স্বাপ্নিক হৃদয়!

মানুষের উৎপত্তি কি ঘণার জঠরে?  
নাকি কোনো নাগিনীর দীর্ঘশ্বাসে?

ডবিত্যত শুয়ে আছে সাপের গুহায়  
বর্তমান কম্পমান!

অথচ আমারও অতীত ছিল—  
অতীত ছিল—

মহান ইতিহাসের মত মধ্য এশিয়ার ।

অবশেষে তুমি এলে—

তুমি এলে এমনি এক সময়  
দীর্ঘ সফরের ক্লান্তিতে যখন আমি মুহ্যমান ।

## ঘরহীন ঘরে

আর কতভাবে ব্যবচ্ছেদ করবে আমাকে? করো ।  
প্রতিটি প্রহর চলে গেছে নিয়তির প্রতিকূলে,  
এইতো রেখেছি খুলে অকাতরে দেহের আমূল—  
আমাকে নিয়ে কোথায় যাবে আর মহাকাল? চলো ।

সান্ধ্যখেলা শেষ হলো, এবার ফেরার পালা ঘরে ।  
গ্রাস করেছে সে ঘর দৈত্য আর বানভাসি চরে ।  
দূরে আছে প্রতীক্ষায় হায়েনার বিষাক্ত বদ্বীপ,  
ফেরার তো তাড়া নেই, চোখে নেই স্বপ্নের প্রদীপ ।

পেছনে রাজ আসন, সম্মুখে কেবলি দীর্ঘশ্বাস!  
শকুন-মানুষে যুদ্ধ! এই এক দীর্ঘ ইতিহাস—

সান্ধ্যখেলা শেষ হলো, এবার ফেরার পালা ঘরে ।  
আমার তো ঘর নেই! আছে কিছু ঢেউয়ের মালা,  
এশিয়ার সিংহদ্বারে ঝুলে আছে নিষেধের তালা ।—  
ফেরার এ বৃথা চেষ্টা, প্রতিদিন—ঘরহীন ঘরে ॥

## ঘৃণার উপত্যকা

কতো আর উপেক্ষা করতে পারো?

বৃষ্টির সপক্ষে ছিল আমাদের পূর্বপুরুষেরা  
আর তোমরা এখন বৃষ্টির বিরোধী।  
তবু সহস্র উপেক্ষা পেরিয়ে—  
এখনও বৃষ্টি নামে মুঘলধারায়।

আমিও পেরিয়ে এসেছি ক্রক্ষেপহীন  
উপেক্ষার পর্বত।  
এইতো দাঁড়িয়ে আছি প্রাবিত শহরে  
আর সময়ের শিং-এ ঝুলে আছে কেবল অনিষ্ট—  
তোমাদের ব্যর্থতার প্রলম্ব স্মারক।

কোনো অগ্নিময় প্রশ্বাসও আর  
স্পর্শ করতে পারে না আমাকে।  
ভুলে গেছি দীর্ঘশ্বাসের বিকট গন্ধ।  
ক্যান্সারের মত আমিও পেরিয়ে এসেছি  
শৈশব রোদন।

কতো আর উপেক্ষা করতে পারো? করো।  
আমার পকেটে আছে—  
টপকে যাবার মত দুরন্ত সাহস  
এবং হাতে আছে একটি ঘৃণার উপত্যকা।

## হেমন্তে জাগাও তুমি

এখানে আসে না ঋতু—ঋতুর স্বভাব  
এখানে ঘাসের বুক পড়ে না শিশির  
এখানে জাগে না প্রাণ— প্রেমের তিতির  
এখানে রয়েছে জমা অশেষ অভাব ।

কি এক ব্যথার নদী চলে বাঁকে বাঁকে  
মরা নদী, ঝরাপাতা, খরাভারা বুক  
শোকের বসনে ঢাকে লাঙ্গনার মুখ  
এশিয়ার বুক জুড়ে শকুনেরা ডাকে ।

মানুষ কেবলি আজ মৃত্যুর সোপান!  
এই দেশ, এই ক্ষেত—আমার ভূ-ভাগ  
মাটির গভীরে আছে যত অনুরাগ—  
তোমার শ্রদ্ধাসে তবু ফুধার লোবান!

শরৎ সে এসেছিল, রেখে গেছে বান  
হেমন্তে জাগাও তুমি—শত কোটি প্রাণ ।



## নিগ্হীতার বাহুডোরে

[ঢাকার চারশো বছর পূর্তিতে]

উত্তর বারান্দা থেকে স্পষ্ট দেখা যায় ঢাকার অসংখ্য মিনার  
মগবাজারের সুউচ্চ ওয়ারলেস টাওয়ার, রামপুরার টিভিকেন্দ্র,  
পশ্চিমের ঝিল, এদোডোবা, কলমিফুল কিংবা  
জীবনের মত আঁকা-বাঁকা মাজাভাঙ্গা অগণিত গলিপথ।  
আর বিশ্বরোডের দুপাশে বেড়ে ওঠা অবহেলিত—  
ভাসমান মানুষের বস্তিগুলো যেন তিলোত্তমা নগরীর অনিবার্য পোশাক।

রাত যখন ধাবিত হয় গভীরের দিকে  
রাজধানী যখন মাতাল আর খুনীর দখলে  
লাইটপোস্টের পিলারগুলো যখন বেদনায় মুহামান,  
তখন, গভীর রাতে বারান্দার রেলিং ধরে দাঁড়িয়ে থাকি একা।  
বারান্দার গা ঘেঁষে কয়েকটি নারকেল গাছ দাঁড়িয়ে আছে সটান  
এলোকেশী পাহাড়ী মেয়ের মত ছড়ানো সবুজ পাতায় গর্বিনী  
একেকটি গাছ যেন— বৃটিশ সম্রাজ্ঞী।

আরও গভীর হলে রাত, রাজধানী হয়ে ওঠে রহস্যের ডেরা।  
তখন তাকে কী যে অচেনা লাগে!  
যেন নিজেরই পৃষ্ঠদেশ—যাকে সম্পূর্ণ যায় না দেখা।

প্রতিটি গভীর রাতে, খুব বেশী একা হয়ে গেলে নেমে আসি বারান্দায়।  
দেখি, ট্রেনের স্লিপারের মত চিতানো নারকেল ডাঁটার ওপর  
পালকের নিচে দীর্ঘশ্বাস চেপে বসে আছে একটি বয়সী কাক।  
অমাবস্যা কিংবা জোছনা রাত, ঝড়ো-বৃষ্টি কিংবা শিলার প্রপাত—  
সেই একই ভঙ্গিতে বসে থাকে কাক— নিদ্রাহীন কালের দোসর।

জানিনা ঢাকার বয়স বেশী, নাকি কাকের!

কখনও মনে হয়— কাক নয়; অন্য এক ক্যানভাস।  
আর তখনই রাতের নিঃসঙ্গ, অসহায় কাক হয়ে যায়  
পালক খসা বিধ্বস্ত, লগুভগ ঢাকা কিংবা বিপন্ন বাংলাদেশ।

২.

জোছনাপ্লাবিত রাতে আজ চেয়ে আছি অজস্র স্বপ্নের দিকে ।  
আর ভাবছি, এইতো—এই শহরেই প্রবাহিত হয়েছিল একদা দর্পিত প্রশ্বাস ।  
এইতো দাঁড়িয়ে আছেন ঈসা খান, সম্রাট জাহাঙ্গীর কিংবা মুরশিদকুলি খান ।  
তাদের স্বরণে এখনো কি বুড়িগঙ্গায় কম্পন ওঠে না?  
এখনো কি কাঁপেনা বাতাস তাদের সাহসী অশ্বের হ্রেমাধ্বনিতে?  
তবে আর কোন তরুরের সাধ্য আছে হাত বাড়ায় দুর্গের দিকে!

৩.

আজ প্রত্যুষে যখন বেরিয়ে পড়েছি শায়ন্তা খানের স্বপ্নের শহরে  
আর তখনই পায়ের কাছে আছড়ে পড়লো সেই অতি চেনা  
কাকটির খণ্ডিত মুণ্ড!

কী নিদারুণ অসহায় ভঙ্গিতে সে চেয়ে আছে আমার চোখের দিকে ।  
আশ্চর্য! কীভাবে ঘটে গেল মুহূর্তেই এমন একটি নৃশংস হত্যাকাণ্ড!  
তবে কি নগর ফটকে কোথাও ঘাপটি মেরেছিল সাবলীল অস্ত্রহাতে  
রক্তপিপাসু কোনো হস্তারক!

মুণ্ডহীন কাকটির দিকে তাকাতেই মনে হলো—

কাক নয়, যেন আমারই বুক থেকে ক্রমাগত ঝরে যাচ্ছে

পতাকার বৃন্তের মত টকটকে লাল রক্ত ।

আর আমি পড়ে আছি চারশো বছর ধরে ।

আমারই সমবয়সী— ডানাভাঙ্গা, স্মৃতিহ্রষ্ট এক নিগৃহীতার বাহুডোরে ।

হায়! ঢাকা তো কেবল স্বপ্ন কিংবা মসজিদের শহরই নয়,  
সে এখন রীতিমত বহমান রক্ত এবং ত্রাসের নগরী!

## মুহাম্মদ আসাদ : জন্মশত বর্ষে

রাতটা গভীর ছিল এবং প্রগাঢ় অন্ধকার ।  
ঝড়ো হাওয়া ছিল, ঝড়ের তীব্রতা ছিল ।  
পথটি ছিল দীর্ঘ এবং বন্ধুর ।

সবকিছু উপেক্ষা করে তিনি হাঁটছেন উর্ধ্বশ্বাসে ।  
কোথায় গন্তব্য?  
হঠাৎ থামলেন তিনি ।—  
তারপর মুখ ফেরালেন ধূসর দিগন্তের দিকে ।

এবার চললেন তিনি 'মক্কার পথে' ।  
হাঁটছেন ক্রমাগত ।—  
হাঁটতে হাঁটতে দু'পায়ে ভেসে যাচ্ছেন আঁধারের ছায়া ।  
ভেসে যাচ্ছেন বিরুদ্ধ বাতাসের দর্পিত প্রশ্বাস ।

মক্কার পথ—  
ঐখানে জমা হয়ে গেছে যত সূর্যের আলো ।  
ঐখানে গোল হয়ে বসে গেছে জোসনার মেলা ।  
ঐখানে তশতরী উপচে পড়ে যত কল্যাণের ফল ।

তার পথটি চলে গেছে অজস্র আলোকিত স্বপ্নের ভেতর ।  
চলে গেছে সমুদ্রের কল্লোলিত ধ্বনির গভীরে ।

আসাদ!  
আপনার বাহনের রশিটা একবার আমার দিকে ছুড়ে দিন ।  
আমি ও যে 'মক্কার পথের' এক দারুণ পিয়াসি পথিক!

## বীজতন্ত্র

তোমাকে খুঁজেছি সহস্র বছর ধরে  
পৃথিবীর প্রান্ত থেকে গ্রহের প্রান্তরে ।  
যা কিছু দেখিনা কেন তারই ভিতরে  
তোমাকে দেখি শুধু স্বপ্নের বিবরে ।

কোথায় লুকিয়ে ছিলো? রহস্য গভীরে  
নাকি এই মরুবুকে— আমার অন্তরে?  
নদীকে ডাকি যখন তুমি শোনো ডাক  
শরীরে শরীর ছুঁয়ে দাঁড়াও সবাক ।

বীজের শরীরে দেখ আমার সূক্ষ্মাণ  
ক্রমের ভিতরে আছে লক্ষ কোটি প্রাণ ।  
ঝিনুক দু'ভাগ করে জেগে ওঠো তবে  
এবার কর্ষণে ক্ষেত শস্যভারা হবে ।

জনোর অতীতে আমি চেয়েছি যে ভূমি  
সে তো আর কেউ নয়, তুমি শুধু তুমি॥

## দশ দিগন্তের অন্তরেখা

তেপান্তর পার হয়ে আমি যাচ্ছি তোমার কাছে ।

দিগন্তের বিস্তার আমি দেখেছি

আমি দেখেছি শস্যভার ক্ষেতের গর্বিত মস্তক

কোমল শিশিরে ঢাকা দুর্বাঘাসের আনত দেহ

আর পাখির কলরবে মুখরিত বিয়াল্লিশাটি প্রভাত ।

তুমি কি ছিলে না কখনো আমার স্বপ্নের দোসর?

আমি এখনো আছি কৃষকের মত ক্লান্তিহীন ।

এখনো মধ্যরাতে নাও ছেড়ে দেই বিরুদ্ধ বাতাসে, দর্পিত ভাটিতে

আর আদমসুরাত দেখে ঠিক করে নেই গন্তব্যের নিশান ।

যদিও মানুষই আজ বড় বেশি গন্তব্যহীন!

ভাবতে পার, রাজ্যের বাঁদরগুলো যখন আজ খেয়ার মাঝি

আর যাবতীয় বিবাদ-মীমাংসার একচ্ছত্র অধিপতি মূর্খ শিয়াল পণ্ডিত

তখন কোন্ ভরসায় আর সাতপহরের উজান ভেঙ্গে পৌঁছুতে চাই

তেভাঙ্গা উপকূলে!

তুমি তো জানই—

আমার যাত্রা সর্বদা গতির বিপরীতে, অজ্ঞেয় বিদারী ।

প্রত্যেকটি ফসলেরই মৌসুম আছে, পৃথক ।

আছে ঋতুর কিছু নিজস্ব স্বভাব ।

কিন্তু জন্ম-মৃত্যুর যেমন থাকে না কোনো মৌসুম

ঠিক তেমনি আমি আর প্রতিক্ষা করি না কোনো নির্বিরোধ বসন্তের ।

আমি তো জেনে গেছি, কোনো রাস্তাই এখন আর রাস্তা নেই ।

কোনো আবাসই নেই নিরাপদ, শঙ্কাহীন ।

পৃথিবী নামক গ্রহটি এখন সবচেয়ে পৃতিগন্ধময়, অস্বাস্থ্যকর ডাস্টবিন ।

হত্যা, খুন এবং অবিরাম রক্তবমন ছাড়া এখানে আর কীইবা

সঞ্চয় আছে?

যারা বিশ্রামের দিকে প্রত্যাবর্তন করতে চায়—

আমি তাদের মধ্যে নেই ।

যারা মিথ্যার আবর্তে ক্রমাগত ভাসমান—

আমি তাদের মধ্যে নেই ।

এমনকি যারা উর্বর শস্যভূমি মাড়িয়ে দাবড়িয়ে নিয়ে যায় লালসার যোড়া—

আমি তাদের মধ্যেও নেই ।

খ্যাতি কিংবা অখ্যাতির দোলাচলের রশিটাও ছুড়ে ফেলেছি দূরে ।  
দ্বিধার পোশাকে আবৃত হবার লজ্জা এবং লাঞ্ছনা  
বয়ে বেড়াবার কোনো ইচ্ছাই আমার নেই ।

তেপান্তর পার হয়ে আমি যাচ্ছি তোমার কাছে ।  
তুমি প্রশান্ত হও ।  
যদি সুযোগ পাই, সেলাই করে রেখে যাব  
একটি নতুন নকসিদার পৃথিবী ।  
আমাদের আগত বংশধর যেন তিষ্ঠতে পারে অন্তত কয়েকটা শতক ।

আমার যাত্রার কোনো বিশ্রাম নেই ।

দশ দিগন্তের অন্তরেখায় লিখে দিয়েছি আমার নাম ।  
হে আশ্বনের জঠর! আমাকে আর কিসের ভয় দেখাও?

## আঁধারসঙ্গীত

এতো আঁধার, তবুও তোমাকে চেনা যায় অবিকল ।

এইতো তোমার আঁচলে ঢেকে গেছে

বাংলাদেশের সকল লজ্জা ।

উদ্বেলিত কপোতাক্ষ আর উদভ্রান্ত মাতুল ।

তোমার প্রার্থনা—মেহগনি দাঁড় ।

আর আমার প্রার্থনা—একটি গহনা নৌকা ।

আজ আর কোনো বেদনার গান নয় ।

আজ আর কোনো আলোকিত রাত নয় ।

বরং দীর্ঘ থেকে দীর্ঘতম হোক নিগূঢ় আঁধার ।

আমরা স্বপ্নকে প্রলম্বিত করতে চাই ।

কোনো স্বপ্ন এবং প্রেমের চেয়ে

এমন কী আর আছে অমর-অক্ষয়?

নিভে গেছে শিয়রের বাতি । যাক ।

আজ রাতে বেদনার গান ছেড়ে

শুনবো কেবল ফেনায়িত নদীর

ছলাৎ ছলাৎ দাঁড়ভাঙ্গা তরঙ্গের শব্দ ।

রাতভর গেয়ে যাও তুমি—

ফাতেমাতুজ্ জোহরা ।....

## কাঁদো মন-ক্রন্দসী

কোনো উৎপীড়নই এখন আর আমাকে  
বিচলিত করে না। কারণ এতদিনে জেনে গেছি  
প্রতিটি বিষাক্ত সাপ— সে যত বড় সুন্দরই হোক না কেন  
তার চকচকে ফণার ভেতর লুকিয়ে আছে

জীবনঘাতী বিষ।

বাতাসটা বয়ে যাচ্ছে উল্টো দিকে। যারা সাথী হবে বলে  
একদা কসম খেয়েছিল, তারা দরিয়ার ডাক শুনেই  
দরোজায় খিল এঁটে কেবল লাভ-লোকসানের হিসাব কষে  
বিনিদ্র রজনী পার করে দিচ্ছে।

ছেঁড়া পালের ফুটো দিয়ে তাদের বৈষয়িক চেহারা  
দেখার ক্লান্তিতেই আমার এখন যত অক্ষতি।

তবুও উজানে নাও বেয়ে যখন হৃদস্পন্দন বন্ধ হতে চায়  
তখন অভ্যাসবশত জোরে হাঁক মারি...

পরক্ষণে চোখ মেলে দেখি উন্মাতাল ঢেউয়ের গায়ে  
ঠেস দিয়ে নিজের হাতের কজি ধরে

নিজেই রক্ত চলাচল পরীক্ষা করছি।

দরিয়ার ওপারে কেউ যেন ফুঁপিয়ে কেঁদে ওঠে।

কে কাঁদো অস্থির প্রহরে?

কান্নার স্বাধীনতা আর অফুরন্ত সময় কি তোমার আছে?  
তাহলে কাঁদো, অন্তত আর একবার কাঁদো মন-ক্রন্দসী!



## বরফের পিঠে

ভবিষ্যৎ শুয়ে আছে জীবনের অপর পৃষ্ঠায়  
বর্তমান পাক খায় সন্দেহের সিংহদ্বারে  
আমি পড়ে আছি—  
পড়ে আছি জেব্রাক্রসিং-এর মত নিয়তির বালুচরে ।

গলার ওপরে ঝুলে আছে দণ্ডের করাত  
পাঁজর মাড়িয়ে শামুকের মত হেঁটে যায় হিংস্র হাঙ্গর  
কানে ভাসে বন্য শূকরের বীভৎস চিৎকার  
তবুও ঝিঝিরা নুপুর বাজিয়ে হেসে খেলে গেয়ে যায়  
বিরুদ্ধ সময়ে!

হাজার বছর আগে, যখন ছিলাম মহাশূন্যে ভাসমান  
কিংবা বৈশাখী ঝড়ের মত পায়চারী করতাম  
সময়ের বেলাভূমে

তখনো শুনেছিলাম তোমার তৃষ্ণার্ত ব্যাকুল রোদন ।  
তাহলে তুমিই কি সেই স্বপ্নোচ্ছিত ঝিঝিদের রানী?

বেতস পাতার মত ক্রমাগত দূলে যাচ্ছে মেঘের পালক  
তুমিও দুলছো তৃষ্ণার দোলায়  
তোমার চোখের গভীরে লুকিয়ে আছে প্রতীক্ষার নদী!  
তবে এসো—  
পর্বত টপকে আসার সাহস যদি থাকে, এসো—  
এসো আগুনের সমতটে,  
দেখ, আমার পায়ের চিহ্ন পড়ে আছে বরফের পিঠে ।

## খোয়াব

আজকাল আর খোয়াবেও ভাল কিছু দেখতে পাইনে।  
কী যে দুঃসময়!  
যেন একটা পাথরখণ্ড সীলগালার মত আঁকড়ে রেখেছে  
শতাব্দীর শেষ কটা প্রহর।

আজকাল প্রতিটি রাতেই ঘুম ভেঙে যায় দুঃস্বপ্নের মধ্য দিয়ে।  
দেখি, একটি নেড়িকুত্তা—লোম নেই শরীরে তার,  
লেজটাও খসে গেছে, বামপাশে দগদগে ক্ষত—  
বসে আছে সময়ের সিংহদ্বারে।  
আমাকে দেখেই নেড়িটা কেমন ভয়ংকর দানবীয় দাঁত বের করে  
তেড়ে আসে ক্ষীপ্রগতিতে  
আর আমি উর্ধ্বশ্বাসে দৌড়তে গিয়ে আমার হাত থেকে  
পড়ে যায় চাল ডাল এবং তরতাজা সবজির প্যাকেট।  
ও কি জানে, ঐ প্যাকেটে রয়েছে আমার দুঃখপোষ্য বাচ্চার  
জীবন ধারণের ডানের কৌটা!

লোম ওঠা নেড়ির দাপটে আমাকে দৌড়তে হয় উর্ধ্বশ্বাসে।  
আর আমার বাজারের প্যাকেটের ওপর দাঁড়িয়ে কেমন ঠ্যাং উঁচু করে  
পেচ্ছাব করে দেয় কুত্তাটা।

প্রতিটি রাতে, খোয়াবের মধ্যে এভাবে দৌড়িয়ে  
আমি এখন ক্লান্ত।

আজকাল আর একটুও ঘুমতে পারিনে।  
চোখ বন্ধ করলেই দেখি—  
হিংস্র দাঁত বের করে তেড়ে আসছে সেই কুত্তাটা।  
তেড়ে আসছে তার পিছে পিছে একপাল দাঁতাল শুয়োর।  
আর আমি ওদের ভয়ে দৌড়তে দৌড়তে পার হচ্ছি  
ছাপ্পান্ন হাজার বর্গমাইল।  
কিন্তু আর কত দৌড়াবো? কোথায় যাব?  
সামনেই সীমানার দেয়াল

আমার তো আর কোথাও যাবার জায়গা নেই।  
কেনই বা যাব?  
এই আবাসটুকু যে আমার দশপুরুষের বাস্তুভিটা!

না! কোথাও যাব না আমি,  
এমনকি দৌড়াবো না আর এতটুকু।  
আমি এখন সীমানার পিলারে পিঠ ঠেকিয়ে  
ঘুরে দাঁড়িয়েছি এক হিংস্র প্রতিপক্ষের মুখোমুখি।

কী যে দুঃসময়!  
আজকাল আর খোয়াবেও ভাল কিছু দেখতে পাইনে।

## রক্তভেজা হাতের বদল

কী আর বদল হবে! দৃশ্যপট অবিকল তাই।—  
যেমনটি ছিল বিশ শতকে : সূর্য দিন রাত—  
অবিরাম হানাহানি, সংঘর্ষ আর রক্তপাত  
সাতভূতে ভাগাভাগি, অবশেষে পাথরের ঘাই।

কী আর বদল হবে! হতে পারে হাতের বদল।—  
ম্যাজিকও রয়ে যাবে, রয়ে যাবে রুমালের খেলা  
যথারীতি লাল হবে রাজপথ, ঢেউয়ের মেলা।—  
হতে পারে যুদ্ধের কৌশল আর রিমোট বদল।

কী আর বদল হবে! রয়ে যাবে পশুর স্বভাব—  
অনাহত খরতাপে মাটি হবে কেবলি চৌচির  
স্বপ্নভাসা চোখগুলো পূর্ববৎ হয়ে যাবে থির,  
পতাকা খামচে ধরে কেঁদে যাবে পুরনো অভাব।

কী আর বদল হবে! থেকে যাবে আগের আদল  
একুশ শতক! সেতো রক্তভেজা হাতের বদল।  
১.১.২০০১

## লজ্জার আলো

আমার সম্মুখে কেবল নিরুন্ম কবরভূমি ।  
থুতনির কাছে হাঁটু গেড়ে বসে আছে হিরন্ময় অন্ধকার ।  
মৃত্যুকে পেছনে ফেলে তবু ক্রমাগত ছুটে যাচ্ছি  
ধাবমান বাতাসের মত ।

এমনই দুঃসময়!  
পৃথিবীর কোনো গোলাধঁই এখন আর আমার জন্য  
সহনীয় নয় ।

অথচ কত সহজ ভঙ্গিতে হাঁটছে মানুষ ।

এমন কি তারাও—

শত চেষ্টাতেও বাজে না যাদের প্রাচীন জাদুর দণ্ড ।  
বারুদহীন কার্তুজকে তণ্ড স্টেনগান ভেবে  
পুরনো অভ্যাসে আড়মোড়া ভাঙ্গছে উর্ধ্বমুণ্ড!  
আর শ্রৌটা গণিকার মত প্রার্থনা করছে কিছু নাগরিক সহানুভূতি ।

পেছন থেকে কে যেন গেয়ে উঠলো হেঁড়ে গলায়:

‘যারাই ছিল চতুর নাইয়া

তারাই গেল বাইয়া.....’

গানটি শোনার পর আত্মগ্লানিতে দম্ব হবার আগেই  
আমার সম্মুখে জ্বলে উঠলো

এক ফালি লজ্জার আলো ।

## প্রণয়ের হাঁস

বয়স বেড়েছে মিশোরী মমির চেয়ে  
কত কী যে ঘটে গেছে মধ্যাহ্ন জমিনে!  
হাজার বছর ধরে এই উপকূল  
জ্বলে পুড়ে থাক—নিদারুণ সূর্যদাহে ।

শস্যহীন ক্ষেত এখন ক্রান্তির ভার ।  
জরাগ্রস্ত ঘরবাড়ি, শোকের পাতিল—  
পুরনো তৈজস ঘিরে প্রাচীন রোদন ।—  
এসব পেছনে রেখে হঠাৎ কখনো  
সম্মুখে দাঁড়িয়ে যায় ধূসর অতীত ।  
থেকে থেকে ভেসে ওঠে দ্রাবিড় সময় ।...

পথ চলে যায় দ্রুত—পথের গভীরে  
অবগাহনের দিকে । তবুও ওপাশে—  
সময়ের কাকশীর্ষে প্রণয়ের হাঁস  
ক্রমাগত ভেঙ্গে যায় বঙ্গের বাতাস ॥

## এপিটাফ

যখন কিছু সময় ছিলো  
ফেরার ছিলো দারুণ তাড়া  
তখন তুমি মুখ ফেরালে  
করলে কী যে ছন্নছাড়া!

ভয় কি তাতে হয় পিশাচী  
কষ্টগুলো নষ্ট ভোর,  
তাই বলে কি বন্ধ হবে  
সূর্য ওঠার সকল দোর?

শ্রেমের ছিলে খুব খেলেছো  
ঘর ভেঙেছো নেইতো শোক,  
জীবনটা যে জ্বলেই গেছে  
আর কী আছে কষ্টভোগ?

ছুটছো তুমি ছুটে থাকো  
শেষটা আমি দেখতে চাই  
হায় ডাকিনী তোমার জন্য  
ঝাঁপ দেবো না সাগর বায় ।

এখন বলো: কাল কাটে না  
পাথর যেন সময়গুলো  
চোখের পরে উড়ছে সদা  
বিষাদ ভরা মরণ তুলো ।

যতই ডাকো হাত বাড়িয়ে  
যতই ফেলো চোখের জল  
ফল কি তাতে? কাজ হবে না  
যতই নাড়ো যাদুর কল ।

তোমার খেলা শেষ হয়েছে  
এবার হলো আমার কাল  
শোধ নেবো কি বৈঠা বেয়ে  
ছিড়বো নাকি নায়ের পাল?

ওসব খেলা ভাল্ লাগে না  
খুব খেলেছি জীবন ভর,  
এখন আমি ভিন্ন গাঁয়ে  
ঘর বেঁধেছি হাওয়ার পর ।

## শীতের দরোজা

এই যে মধ্যরাতে ঘুমটি ভেঙে গেল  
সে কেবল তোমারই জন্য ।  
তুমি যদি অমন করে না ডাকতে স্বপ্নে, সঙ্গোপনে  
তাহলে বলো, আমিও কি দেখতে পেতাম  
আবছা কুয়াশাচ্ছন্ন এমন ঈষদোষ্ণ কপোতাক্ষ?

জানালার পর্দাটা আর একটু সরিয়ে দাও ।  
আরও ভাল করে দেখে নিই অদূর-সুদূর তেপান্তর ।  
ওপাশে কি আছে? ওই কিনারে? তোমার পেছনে?

ওই যে পাখিটা উড়ে গেল  
সে কি বয়ে নিয়ে গেল আমাদের যাবতীয় ভবিষ্যৎ?  
কোনো অশুভ বুলে নেই তো তার চঞ্চুতে?—

এসব প্রশ্নই বড় বেশি অলীক এখন ।  
তার চেয়ে এই ভাল—  
এসো শীতের দরোজা খুলে অবগাহন করি  
বর্তমানের বনেদি কুয়ায় ।  
দেখ, কবুতরের হাক্কা পালকের মত কেমন শাদা শাদা  
শিশিরের কুঁচি ছড়িয়ে আছে চারপাশ ।

এসো, আমরা এখন নির্মাণ করি একটি সেতু, আগামীর জন্য ।  
দুই শতকের ঠিক মাঝখানে,  
চুলের সিঁথির মত যেখান থেকে চলে গেছে দুদিকে মহাকাল ।  
যেখানে দাঁড়িয়ে আছি তুমি আর আমি, মুখোমুখি—

শীতের দরোজা খুলে

এই মধ্যরাতে ।



## ডামি

এটা হল সূচিপত্রহীন এক জীবনের ডামি।—

চব্বিশ পয়েন্টে স্বপ্নহীন হেডিং

আঠার পয়েন্টে তাবৎ দীর্ঘশ্বাস

আর সাবহেডিংগুলো বেদনার,

চোদ্দ পয়েন্টে।

ডামিটা নির্ভুল হল কি?

ও, হ্যা। এইখানে—

বিধ্বস্ত এই মানচিত্রের মাঝখানে স্কেচ হবে—

অগণিত কঙ্কাল আর তার চারপাশে

ধূর্ত শিয়াল ও শকুনের নিখুঁত স্কেচ।

স্কেচটা কে করবেন?

জয়নুল হলে ভালই হত।

সুলতানের আঁকা সুঠাম দেহের মানুষ

এই উপমহাদেশে কোথায় পাব?

ডামিটা অসম্পূর্ণই রয়ে গেল।

একপাশে জীবন

অন্য পাশে ডামি

মাঝখানে উল্টে যাওয়া ট্রেনের বগির মত

আমি এক মানুষ বটে!

মোশাররফ হোসেন খান

বিশ্ব  
দুঃখে  
মনের  
মুক্তি

